

L I G J
Nr. 8668, datë 23.11.2000

**PËR PAJISJEN E SHTETASVE SHQIPTARË ME PASAPORTË PËR JASHTË
SHTETIT**

*(Ndryshuar me akt normativ nr. 5¹, datë 31.8.2001; me ligj nr. 8998, datë 31.1.2003; nr. 10306,
datë 22.7.2010; nr. 41/2014, datë 17.4.2014; nr. 2/2019, datë 31.1.2019; me aktin normativ nr. 23², datë
3.6.2020)*

(i përditësuar)

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I

**I REPUBLIKËS SË SHQIPËRISË
V E N D O S I:**

Neni 1

(Shtuar fjali me ligjin nr. 10306, datë 22.7.2010)

Pasaporta për jashtë shtetit është dokumenti që vërteton identitetin dhe shtetësinë shqiptare të mbajtësit të saj, me anën e së cilës ai mund të dalë e të hyjë nga dhe në territorin e Republikës së Shqipërisë, si dhe të udhëtojë nga një shtet i huaj në një tjetër.

Pasaporta për jashtë shtetit është një dokument me shkallë të lartë sigurie, në përputhje me konventat dhe marrëveshjet ndërkombëtare. Në elementet e sigurisë përfshihen të dhënat biometrike, përmbajtja e të cilave përcaktohet me vendim të Këshillit të Ministrave.

Neni 2

Të gjithë shtetasit shqiptarë kanë të drejtë të pajisen me pasaportë.

Shtetasit shqiptarë, që me vendim të gjykatës kanë zotësi të pjesshme për të vepruar ose nuk kanë zotësi për të vepruar, pajisen me pasaportë vetëm me kërkesë të prindërve ose të kujdestarit të tyre.

Neni 3

(Shfuqizuar paragrafi i dytë me ligjin nr. 10306, datë 22.7.2010)

Shtetasit deri në moshën 16 vjeç pajisen me pasaportë të vlefshme për 5 vjet, ndërsa ata mbi 16 vjeç pajisen me pasaportë të vlefshme për 10 vjet.

Neni 4

Pasaporta shqiptare është e zakonshme, shërbimi dhe diplomatike.

Kriteret për lëshimin e pasaportës së shërbimit dhe asaj diplomatike përcaktohen me vendim të Këshillit të Ministrave.

¹ Akt normativ nr. 5, datë 31.8.2001 është miratuar me ligjin nr. 8822, datë 15.10.2001.

² Akt normativ nr. 23, datë 3.6.2020 është miratuar me ligjin nr. 77/2020, datë 25.6.2020.

Neni 5

(Ndryshur togfjalësh me ligjin nr. 10306, datë 22.7.2010)

Pasaporta e zakonshme lëshohet nga Ministria e Brendshme, ndërsa pasaporta e shërbimit dhe ajo diplomatike lëshohen nga Ministria e Punëve të Jashtme.

Për shtetasit shqiptarë, me banim jashtë shtetit, veprohet sipas rregullave të caktuara nga Ministria e Brendshme dhe Ministria e Punëve të Jashtme.

Neni 6

(Ndryshuar me ligjin nr. 10306, datë 22.7.2010)

Procedura e aplikimit dhe dokumentet që paraqiten për aplikim përcaktohen me udhëzim të Ministrit të Brendshëm.

Neni 7

(Ndryshuar me ligjin nr. 10306, datë 22.7.2010)

Pasaporta e zakonshme tërhiqet pranë drejtorive dhe komisariateve të policisë. Tërheqja e pasaportës kryhet nga shtetasi ose i ngarkuari me prokurë të posaçme apo një pjesëtar i afërt i familjes (bashkëshortja/prindi, fëmija madhor) apo kujdestari ligjor për të miturit dhe për shtetasit pa zotësi për të vepruar.

Pasaporta e shërbimit dhe ajo diplomatike tërhiqen pranë zyrës përkatëse në Ministrinë e Punëve të Jashtme.

Neni 8

Shtetasit i bllokohet pasaporta kur:

- ka të dhëna të mjaftueshme se mbajtësi i saj e ka marrë atë duke falsifikuar dokumentet për lëshimin e saj;
- në pasaportë ka shënime të bëra nga organe ose persona të paautorizuar;
- ka lënë funksionin, për të cilin ka marrë pasaportën e shërbimit ose atë diplomatike, me përjashtim të rasteve kur me ligj të veçantë është parashikuar ndryshe.

Neni 9

(Shtuar fjalë në nëndarjen e parë dhe hequr fjalë në nëndarjen e dytë me ligjin nr. 10306, datë 22.7.2010)

Pasaporta shpallet e pavlefshme kur:

- denoncohet nga vetë shtetasi se i ka humbur, i është vjedhur ose grabitur, kur ndryshojnë përbërësit e gjendjes civile;
- është dëmtuar;
- i janë plotësuar fletët me shënime zyrtare;
- vërtetohen rastet e përcaktuara në nenin 8 të këtij ligji.

Neni 10

Vlerësimi dhe administrimi i pasaportës së pavlefshme bëhet përkatësisht nga organi që e ka lëshuar.

Neni 11

Ripajisja me pasaportë biometrike e shtetasve

(Ndryshuar me ligjin nr. 2/2019, datë 31.1.2019)

1. Shtetasi ripajiset me pasaportë biometrike:

- a) në rastet e përcaktuara në nenin 9 të këtij ligji;
- b) kur pasaportës i ka mbaruar afati i vlefshmërisë;
- c) 6 muaj përpara mbarimit të afatit të vlefshmërisë, kur udhëton apo qëndron përkohësisht në shtete që kushtëzojnë hyrjen ose qëndrimin me afatin 6-mujor të vlefshmërisë së pasaportës.

2. Procedura për ripajisjen me pasaportë biometrike të zakonshme dhe dokumentacioni që paraqitet përcaktohen me udhëzim të ministrit të Brendshëm.

Neni 12

(Shfuqizuar me ligjin nr. 10306, datë 22.7.2010)

Neni 13

(Hequr fjalë me ligjin nr. 10306, datë 22.7.2010)

Modeli i pasaportës miratohet me vendim të Këshillit të Ministrave.

Neni 14

Pajisja me pasaportë të re, sipas këtij ligji, do të bëhet pas përfundimit të vlefshmërisë së pasaportës ekzistuese me të cilën është pajisur çdo shtetas shqiptar.

Neni 14/1

Dispozitë kalimtare

(Shtuar me aktin normativ nr. 5, datë 31.8.2001; ndryshuar me ligj nr. 8998, datë 31.1.2003)

Neni 3 i këtij ligji zbatohet pas datës 31.12.2005. Deri në këtë datë, shtetasit e moshës mbi 16 vjeç pajisjen me pasaportë të modelit ekzistues të vlefshme për 5 vjet, me të drejtë përtëritjeje deri në 3 vjet, ndërsa të miturit e moshës deri 16 vjeç pajisen pranë organit të policisë me leje kalimi të modelit ekzistues të vlefshme për 6 muaj dhe vetëm për një udhëtim.

Neni 14/2

Dispozitë kalimtare

(Shtuar me ligjin nr. 41/2014, datë 17.4.2014)

Afati i vlefshmërisë së pasaportave biometrike, të lëshuara gjatë periudhës 1 prill 2009 – 31 korrik 2010, me afat vlefshmërie 10 vjet, për të gjithë shtetasit shqiptarë me moshë deri në 16 vjeç në kohën e aplikimit, zgjatet me 1 vit nga dita e plotësimit të afatit ligjor prej 5 vitesh.

Neni 14/3

Dispozitë kalimtare

(Shtuar me aktin normativ nr. 23, datë 3.6.2020)

Afati i vlefshmërisë së pasaportave të shtetasve shqiptarë, që përfundon brenda vitit 2020, zgjatet deri në datën 31 dhjetor 2020.

Dispozitë kalimtare

(Parashikuar në ligjin nr. 10306, datë 22.7.2010)

Pasaportat e vlefshme jobiometrike mund të nxirren nga qarkullimi përpara mbarimit të

afatit të vlefshmërisë me vendim të Këshillit të Ministrave.

Tarifat për pajisjen dhe ripajisjen me pasaportë biometrike janë të përcaktuara në kontratën koncesionare, ratifikuar me ligjin nr.9972, datë 28.7.2008. Me përfundimin e kësaj kontrate, këto tarifa do të përcaktohen me akte ligjore dhe nënligjore.

Neni 15

(Shtuar togfjalësh me aktin normativ nr. 5, datë 31.8.2001)

Dekreti nr. 7393, datë 12.6.1990 “Për lëshimin e pasaportave dhe dhënien e vizave”, me ndryshimet e bëra, si dhe çdo dispozitë, që bie në kundërshtim me këtë ligj, shfuqizohen, duke mbetur në fuqi përkohësisht dispozitat e përcaktuara në nenin 14/1 të këtij ligji.

Neni 16

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr. 2817, datë 5.12.2000 të Presidentit të Republikës së Shqipërisë,
Rexhep Meidani**